



INATSISARTUT

Aningaasaqarnermut Naalakkersuisoq

Ulloq: 24. oktober 2018
J.nr.: 01.31.06/18-00798

Aningaasaqarnermut Akileraartarnermullu Ataatsimiititaliap arfininngornermi ulloq 13. oktober 2018 aalajangiineranik Naalakkersuisunut ilisimatitsineq.

Missingersuusiornermut Naatsorsuuserinermullu inatsit naapertorlugu 2018-imut missingersuutinik nalunaarsuinissamik malinnikkallannginnissaq pillugu ilassutitut aningaasaliissuteqarnissamik qinnuteqaat. – Suliaq nr. 01.31.06/18-00798.

Naalakkersuisut **inassutigaa**,

”2018-imi ilassutitut aningaasaliissutitut inatsisissatut siunnersuummi suliaasaqarfik 20-24-mut Aningaasaqarnermut Akileraartarnermullu Naalakkersuisoqarfimmut tungasumut atatillugu ilanngussaq ilanngunneqartoq naapertorlugu oqaasertaliussaq nr. 2 ilanngunneqassasoq.”

Aningaasaqarnermut Akileraartarnermullu Ataatsimiititaliap oqaaseqaatai apeqqutaalu:

Inassuteqaatit matumani pineqartut Aningaasaqarnermut Akileraartarnermullu Ataatsimiititaliamit maanna inaarlugit suliarineqarput.

Periutsitigut naapertuutinngitsut iluarsiivigineqarnissaat kisiat pineqarmat inassuteqaammik matumani pineqartumik kingullermik suliarinninnermini ataatsimiititaliap pingaartippaa. Aqutsivigineqarnissaanik ajornarsisitsisunik aammalu siunertarineqartutut atuussinnaannginneranik kinguneqartunik missingersuusiornermut inatsimmi akuerineqartumi aalajangersakkani arlalinnik ajornartorsiuteqarneranik Naalakkersuisut paasissutissiinerat aalajangiinnermini ataatsimiititaliap pingaaruteqartippaa. Pissutsit taakku aaqiivigineqarnissaannik sulinertik Naalakkersuisut ingerlatinnassagaat ataatsimiititaliamit naatsorsuutigineqarpoq. Kiisalu suliaq una ataasiartumik pisussatut ataatsimiititaliamit isigineqartoq aammalu akuersineq missingersuusiornermut inatsimmi aalajangersakkat malinneqannginnissaannik maligassiuissinnaanngitsoq ataatsimiititaliamit erseqqissaatigineqassaaq.

Kiisalu Naalakkersuisut Naalakkersuisut ulloq 5. september ima paasissutissiinerat ataatsimiititaliamit pingaartinneqarpoq:

”Taamaalilluni qinnuteqaat akuersissutigineqassappat tamanna aningaasanut inatsimmut aningaasatigut kinguneqaateqassanngilaq. Tamanna Naalakkersuisut aamma siunissami AIS2019-imi isertitat aningaasartuutillu oqimaaqatigiinnissaannik periutsimik attassiinnarnerat apeqqutaatillugu soorunami pissaaq.”

Ataatsimiititaliami ikinnerussuteqartut Inuit Ataqtigiit ilaasortaataaasa, Suleqatigiissitsisut ilaasortaataanni taparserneqarlutik, oqaaseqaat imaattoq saqqummiuppaat:

“Missingersuusiortnermut Naatsorsuuserinermullu inatsit naapertorlugu Naalakkersuisut inatsimmik malinninngikkallarnissaminnik tunngavilersuutaasa ilaat isumaqatigaa-gut. Matumanili aningaasatigut kisitsisinngorlugit sunniutissai pillugit Inuit Ataqtigiit qulaajaaniaraluarneput tikilluaqquneqarsimangilaq pisimananilu.

Missingersuusiortarneq Naatsorsuusiortarnerlu pillugit inatsit suleriaasissamut tunngatillugu sammineqarpoq, aningaasatigullu eqquinerlunnginnissaa siunertaralugu Naalakkersuisunut apeqqutit ingerlatissimagaluarpagut suli maannakkumut kisitsisiti-gut sunniutissai pillugit Naalakkersuisuniit akisoqanngilaq. Tamannalu Aningaasaqarnermut Ataatsimiititaliap peqqissaartumik sulisussaananut naapertuutinningsoq Inuit Ataqtigiit isumaqarpugut.

Inatsisartut Naalakkersuisullu sulinerisa avataatigut inuiaqtigiit aningaasaqarnerat peqqissaartumik aamma qulaajaasimalluni aalajangersaanissat qitiutippagut, qulaajarniakkavukku iluatsinngitsut kisianni inuiaqtigiit aningaasarsiornikkut peqqissaartumik ingerlanneqarnissaannut inatsisit avaqqutaarlugit aqutseriaaseqarnissaq suleqatigiit periuseriniagaat ilalersinnaanngilagut.

Inatsisit avaqqutaarlugit naalakkersueriaaseqarnissaq akuerissallutigu tunngavissaqanngilagut. Naalakkersuisuniit tunngavilersuutigineqartut amigaqaat, taamaalillunilu inuiaqtigiit aningaasaataannik ataatsimiititaliap nakkutilliiniarnera amigartumik tunngavilersuutitalimmik suliarineqarsimasutut nalilerparput. Tamannalu pinngitsoortin-niarlugu aningaasatigut kingunissaasa qulakkeerlugit oqaaseqarfigineqarnissaat angu-sinnaasimangilarput. Naatsorsuutiginningsamik siunertaanngitsumillu aningaasanik aalajangiinerup kingunerluuteqannginnissaa sulinermi qulakkeerneqanngilaq. Taama-tut tunngavilersuuteqarluta Inuit Ataqtigiit akerliulluta Naalakkersuisuniit aamma suleqatigiinniit suleriaaserineqartoq naammaginagu ikinnerussuteqarluta oqaaseqaa-terput ilanngupparput.”

Aningaasaqarnermut Akileraartarnermullu Ataatsimiititaliap aalajangiinera

Siuliani allassimasunik oqaaseqaateqarlutik Naalakkersuisut inassuteqaataat Aningaasaqarnermut Akileraartarnermullu Ataatsimiititaliami amerlanerussuteqartut Siumup Demokraatillu ilaasortaataasa **akuersissutigaa**t.

Siuliani allassimasunik oqaaseqaateqarlutik ikinnerussuteqartutullu oqaaseqaateqarlutik Naalakkersuisut inassuteqaataat Aningaasaqarnermut Akileraartarnermullu Ataatsimiititaliami ikinnerussuteqartut Inuit Ataqtigiit Suleqatigiissitsisullu ilaasortaataasa **itigartit-sissutigaa**t.

Inussiarnersumik inuulluaqqusillunga



Hermann Berthelsen

Aningaasaqarnermut Akileraartarnermullu Ataatsimiititaliap siulittaasua